

華嚴經普賢菩薩行願品卷二

唐罽賓國三藏般若奉詔譯 澄觀述疏

◎海雲比丘二住章

△第二海雲比丘寄治地住。謂常隨空心，淨治八萬四千法門，清淨潔白。練治心地，故名治地。文具六段。

爾時善財童子聞善知識教，一心正念，隨順思惟，所有智慧光明門。隨順通達所有甚深解脫門。隨順憶持所有自在三昧門。隨順敬奉所有清淨教海門。隨順觀察所見諸佛威德門。隨順欣樂所見諸佛住處門。隨順解了所見諸佛軌則

門。隨順思念所見諸佛出現門。隨順趣入所見諸佛法界門。
。隨順安住所見諸佛境界門。

第一依教趣求中二。先依教正觀，此明溫故。後趣求後友，意欲知新。又前學而能思。後即思而能學。然思前猶屬前會。謂上來親近善友，次聽聞正法，今正念思惟，及如說修行，即是涅槃二十五中四近因緣。今以前義屬後進趣，後義屬於前友指來，互為鉤鎖，主伴交參。故從會判，屬於後耳。下皆準此。今初。念前中有十一句。初句為總。謂聞善友教，一心正念。後隨順思惟下十句為別。舊經

十句皆云正念觀察，謂不沈不舉，寂照雙流。今乃含在總句之中。其別句內，隨順則通。其思惟等隨當句中所宜各異。謂智光明宜言思惟。其解脫門須通達等。言隨順者，隨順事理皆無違故。一即思前觀境自在等。二即達前作用解脫。三即持前一行三昧，亦推勝中諸三昧門。四即敬前聞佛說法。五即觀前所見諸佛。六即樂前十方住處。七即了前壽命神通等。八即見前佛成正覺。九即入前所詮法界。十謂一行三昧所觀之佛同法界故。十通住前諸佛境界。

漸次南行，向海門國。

後漸次下，趣求後友，可知。

詣海雲比丘所，頂禮雙足，繞無數匝，於前合掌。

第二詣海雲下，見敬諮問。文中二。先見敬。

白言，聖者，我已先發阿耨多羅三藐三菩提心，欲入甚深最上智海。而未知菩薩云何能具菩薩行，長養菩提種。云何能捨凡夫家，生於如來家。云何能度生死海，入佛智慧海。云何能離凡愚地，入佛最勝地。云何能斷生死流，入佛淨行流。云何能壞生死輪，成就大願輪。云何能滅魔境

界，顯示佛境界。云何能竭愛欲海，增長大悲海。云何能閉三塗八難門，開人天涅槃門。云何能出三有繫縛城，入種智解脫城。云何能棄捨一切珍玩資具，饒益攝受一切眾生。唯願慈悲，為我宣說。

後白言下，諮問。於中二。先自陳發心。後而未知下，正問法要。其中言生死輪者，如汲井輪，循環無已故。大願輪者，盡眾生界窮無際故。眾生界盡，大願方終。故對生死，以立輪稱。餘所問義，在相可知。雖含義理。經文浩博，不可繁說。

△第三時海雲下，稱讚授法。文中分二。先讚法器。後授法要。

時海雲比丘告善財言，善男子，汝已發阿耨多羅三藐三菩提心耶。

前中三。初友本問。以發心者難可得故。若不發心，非法器故。

善財言，唯，我已先發阿耨多羅三藐三菩提心。

次善財下，答非虛妄。

海雲告言，善哉善哉，善男子，發菩提心者不可得聞，何況自能深心發趣。

後海雲告言下，正讚發心。於中二。先標讚。

善男子，若諸眾生未曾修種深固善根，則不能發阿耨多羅三藐三菩提心。是故菩薩要得平等無礙境界普門善根光明照故。要得真實巧方便藏正道三昧光明照故。要得積集功德海藏廣大福聚莊嚴身故。要得增長種種白法念念出生無休息故。要能供事真善知識諮問法要無疲厭故。要捨慳吝

無所藏積，於身命財無愛著故。要離憍慢，心無高下，安住不動如大地故。要恆慈愍隨順眾生平等饒益無違逆故。要處生死，於惡趣中度苦眾生，心不捨故。要恆觀察如來境界。欣求修習至究竟故。要恆利益安樂一切諸眾生故。如是乃能發菩提心。

後善男子若諸眾生下，釋讚。於中亦二。一因緣難具故，發者為希。二發心相勝故，發者難得。今初亦二。先反說是因。後是故菩薩要得下，順說。有十一句。近友為緣。餘皆是因。初句為總。即宿植普賢無礙法門成種姓故。二要得真實下，別。初得真如三昧智光，了心實性，不住了相，

名巧方便。知心含藏一切功德，故稱為藏。是為直心，故云正道。得此光明，能真發心。餘可思準。

發菩提心者，所謂拔濟苦惱諸眾生故，發大悲心。平等福祐諸眾生故，發大慈心。除滅眾生諸苦蘊故，發安樂心。為息眾生不善心故，發饒益心。救護怖畏諸眾生故，發哀愍心。捨離執著障礙法故，發無著心。普遍法界諸佛剎故，發廣大心。等虛空界無不往故，發無邊心。見一切佛妙色身故，發無垢心。觀三世法智無盡故，發清淨心。為欲普入一切智智甚深海故，發大智心。發如是等種種心故，是名菩薩發菩提心。

二發菩提心者所謂下，發心相勝故。即正顯示菩提心相。亦當教其發菩提心。於中二。先別。後結。今初。有十一句。亦是三心，亦四弘心。初五誓度眾生。次一誓斷煩惱，謂捨執著故。次二誓學法門。後三誓成佛道。一成色身。二寂諸障。三成種智。此中諸句皆順梵本。若順此方，合云，發大悲心，拔濟苦惱諸眾生故。十句例然。又此十心多同治地，恐繁不會。後發如是下，總結。

△第二善男子我初止住下，正授法要。謂觀法海覩佛聞法。次前念佛明聽法者。法為良藥，勸物弘傳。故有偈云，假

使頂戴經塵劫，身為牀座滿三千，若不傳法利眾生，畢竟無能申報者。又表此位勝進之中，誦習多聞等是所尚故。於中二。一正明修觀。二觀成利益。

善男子，我初止住此海門國十有二年，常以十事觀察大海而為境界。

前中三。一總標時分。二順顯觀修。三反以結歎。今初。言十二年者，一紀已周，過十千劫，已入第二治地住故。

所謂思惟大海寬廣難量。思惟大海深難得底。思惟大海同一鹹味。思惟大海出生眾寶。思惟大海吞納眾流。思惟大海水色差別不可思議。思惟大海種種眾生之所依住。思惟大海容受無量大身眾生。思惟大海能受大雲所雨之雨。思惟大海究竟恆滿無有增減。

二所謂下，別顯觀修。然海有法海智海悲海生死海等，種種不同。準十地經大海十義，即佛智海。十表十地，各有所以。今次不同，復有開合及有無異。故依當文大悲海釋。即彼住中發十種心。一利益心，利益寬廣故。二大悲心，大悲甚深無能測故。三安樂心。梵本舊經俱是漸次深廣

。始於世樂，種種與故。今云同一鹹味，譯人之意。四安住心。謂惡行眾生，令住善行。善行即是眾寶莊嚴。五憐愍心。悉包納故。六攝受心。種種外道，攝令正信。如多色水，同在海中。七守護心。已發心者皆守護故。是為無量眾生所依。八同己心。謂攝菩提大願眾生，取如己身。有菩提願，為大身故。九即師心。謂於大乘道集進趣者，推之如師。師必諮受，如受大雨。十導師心。謂具功德者，敬之如佛。故湛無增減。以此十心對斯十喻，有如符契，不應妄故。

善男子，我復思念世間之中，頗有深廣過此海不。乃至容受常無增減過此海不。

三善男子我復下，反以結歎。世無過故。前託事顯詮，今亡詮求旨，離海更求故。梵本舊經皆唯四句云，頗有廣博過此海不，頗有無量過此海不，頗有甚深過此海不，頗有殊特過此海不。一廣，二多，三深，四勝。初二是前第一開出，三即第二，四即第六。故梵本云頗有種種色者過此海不。以餘六句不出深廣。又餘處容有，故更不牒。撮成四義，結以稱歎。

△第二善男子我作如是思惟之時下，觀成利益。由前忘詮，今此得旨。便覩華開，真佛顯現。文中二。先見佛。後聞法。

善男子，我作如是思惟之時，從大海中有大蓮華，眾寶莊嚴欬然出現。以無能勝帝青玻胝迦金剛摩尼王寶為莖。毗瑠璃摩尼王寶為臺。無垢清淨閻浮檀金為葉。隨時芬馥白栴檀香，沈水妙寶而為其藏。黃色映徹碼瑙寶王以為其鬚。百萬摩尼寶莊嚴網羅布其上。凡所莊校，周圍無際。光榮四照，彌覆大海。

前中亦二。先見依。後見正。前中有三。初標體相。以上深觀心海悲海，則心華行華自然敷榮。無漏性德，一時顯現。

百萬欲天王普雨種種天寶，天華，天鬘，天香，天燒香，天塗香，天末香，天妙衣服，天幢旛蓋，如雲而下。百萬龍王起大香雲，雨眾香水。百萬夜叉王獻以種種珍奇寶藏。百萬羅剎王各以慈心，合掌觀察。百萬乾闥婆王以妙樂音，歌詠讚歎。百萬阿脩羅王執持其莖，曲躬而立。百萬迦樓羅王銜諸瓔珞，妙寶繒帶，四面垂下。百萬緊那羅王起饒益心，歡喜愛樂。百萬摩睺羅伽王起清淨心，恭敬禮拜。百萬人王起殷重心，合掌瞻仰。百萬轉輪聖王各以七

寶莊嚴供養。百萬梵天王頭頂禮敬。百萬淨居天恭敬合掌。百萬主海神俱時出現，恭敬作禮。百萬主火神各持種種妙寶莊嚴。百萬味光摩尼寶光明普照。百萬淨福摩尼寶布散莊嚴。百萬遍照摩尼寶為清淨藏。百萬離垢藏摩尼寶其光赫奕。百萬吉祥藏摩尼寶放妙光明。百萬妙藏摩尼寶光照無邊。百萬閻浮幢摩尼寶周布行列。百萬不可壞金剛摩尼寶清淨莊嚴。百萬日藏摩尼寶廣大清淨圓光普照。百萬可愛樂摩尼寶顯現眾色，具足莊嚴。百萬心王摩尼寶放雜色光，雨無盡寶。

二百萬欲天下，外相為嚴。

此大蓮華所有莊嚴，皆從如來過去積集出世廣大善根所生

。令諸菩薩各於此華信願成滿。普於十方一切世界無不顯現。從如幻觀香王業生，以無生法所莊嚴故。從如夢觀離相法生，以無作法之所印故。從無染著離諍法生，隨境觀察無所著故。恆出妙音，演說如來廣大境界。其聲充滿一切諸佛清淨剎土。假使無數百千億劫，以妙辯才，稱讚此華，功德無盡。

三此大蓮華所有莊嚴下，舉因顯勝。

善男子，我時於此蓮華之上，見有如來，結跏趺坐。相好具足。形量高廣，上至有頂。如來所處寶蓮華座不可思議。道場眾會不可思議。圓滿智慧不可思議。圓光照耀不可思議。威儀隨現不可思議。光明熾盛不可思議。諸相隨好

不可思議。變現自在不可思議。神通調伏不可思議。清淨妙色不可思議。無見頂相不可思議。舌相長廣不可思議。辯才善巧不可思議。圓音普演不可思議。無量智力不可思議。清淨無畏不可思議。無礙解智不可思議。憶念彼佛往修本行不可思議。菩提自在不可思議。法雷震吼不可思議。普門示現不可思議。種種莊嚴不可思議。隨其左右見各差別不可思議。普遍饒益咸令成熟不可思議。

第二善男子我時於此下，見正報。謂心行既敷，本覺如來忽然出現。

善男子，時彼如來於蓮華上，即伸右手而摩我頂。為我演

說普眼法門。

第二善男子時彼如來下，聞法。所以海中說者，大悲性海所流演故。於中三。初演說。二受持。三轉授。今初有二。先總標。後別釋。今初。言普眼者，略有五義。一詮普法故。二普詮諸法故。三得此法者一法之中見一切故。四唯是十眼之所見故。五非唯十眼圓明方見，能所不異方能見故。是義云何。謂諸緣發見，緣各為根。因沒果中，緣皆號眼。故全色為眼，恆見色而非緣。全眼為色，恆稱見而非我。非我離於情識，非緣遠於尋求。收萬像於目前，

全十方於眼際。是以緣義無盡，隨見見而不窮。物性叵思，應法法而難準。故法普即眼普，義通乃見通。體之而寂，照之乃重重。斯眼所見，為普眼法門也。

顯發一切菩薩諸行。開演一切如來境界。闡揚一切諸佛妙法。光照一切諸佛刹土。圓滿一切諸佛相好。摧伏一切外道邪論。散滅一切諸魔軍眾。能令一切眾生歡喜。調伏一切眾生煩惱。能照一切眾生心行。善了一切眾生根性。能以威力普轉法輪。隨眾生心悉令開悟。

後顯發一切下，別釋普眼之用。謂無行不開，無境不照，

無德不具，無用不周，故為普耳。

我從彼佛得聞於此普眼法門，受持讀誦憶念思惟。假使有人以大海量墨，須彌聚筆，書此無盡廣大海藏普眼法門一品中一門，一門中一法，一法中一義，一義中一句，乃至少分，尚不可得。何況盡能具足書寫。

二我從彼佛下，明受持。於中二。先顯所持法多。以是一多互相即入無盡法故。

善男子。我於彼佛千二百歲受持如是普眼法門相續不斷。

後善男子我於彼下，別顯持多之相。於中二。先標長時。千二百歲，同十二年。

於日日中常以十種陀羅尼門領受記持十無數品所謂以聞持陀羅尼光明，領受無數品。以寂靜門陀羅尼光明，趣入無數品。以無邊旋陀羅尼光明，普入無數品。以隨地觀察普遍照耀陀羅尼光明，分別無數品。以具足威力陀羅尼光明，普攝無數品。以蓮華莊嚴陀羅尼光明，引發無數品。以微妙言音陀羅尼光明，開演無數品。以虛空藏陀羅尼光明，顯示無數品。以光聚山陀羅尼光明，增廣無數品。以海藏普持陀羅尼光明，辨析無數品。

後於日日下，別彰能所持相，有十種持。於中二。先標。後所謂下，列。初一聞持。餘皆義持。二契本寂智，方能入故。三旋轉無量，方能普入。云何旋轉。謂如字輪，旋轉布列。一字之中轉出多義。展轉遞出，名之為旋。智者禪師云，從空入假，從假出中，互觀出入，皆旋轉義。又旋是旋復，顯是深義。四地地義殊，一時普照，方能分別相用得果。五普攝在懷，方有威用。若約所詮而明攝者，即以威力攝諸眾生，同九地中威德總持。六如華引果，開發於教，引行果故。又華開見實，菡萏芬敷，以為莊嚴。開發言教，旨趣昭著，文義相隨，故名引發。七音聲總持

。八如空包含，名虛空藏。見性空理，諸相歷然。九以多智光，積而高顯，方能增廣。如聚光明，以成山岳。十如海無心，含容萬類，亦能印現，故名為藏。法合可知。依此而持，豈離言詮，別求解脫。此十即是彼位勝進誦習多聞虛閒寂靜十句之相。但有開合及廣略耳。

善男子，是時十方一切世界各有無量諸眾生等，為聽法故而來我所。所謂天王，龍王，夜叉王，乾闥婆王，阿脩羅王，迦樓羅王，緊那羅王，摩睺羅伽王，人王，梵王，如是諸王，并其眷屬，來詣我所，諮問我法。我悉為其次第開演，分別解說。咸令歡喜，心生愛樂。深信趣入，悟

解成就。安住於此諸佛菩薩光明妙行普眼法門。

第三善男子是時十方下，轉授可知。

善男子，我唯知此普眼法門。如諸菩薩摩訶薩深入一切菩薩行海，隨其願力皆清淨故。深入一切廣大願海，盡一切劫住世間故。深入一切諸眾生海，隨其心行普饒益故。深入一切眾生心海，出生無礙十力智故。深入一切眾生根海，隨時調伏令成熟故。深入一切同異剎海，為滿本願悉嚴淨故。深入一切無盡佛海，常願承事興供養故。深入一切正覺法海，能以智慧咸悟入故。深入一切佛功德海，於真實道具足修故。深入一切諸言辭海，遍一切剎轉法輪故。而我云何能知能說彼功德行。

第四善男子我唯下，謙已推勝。先謙已結前。後如諸下，推勝進後。略舉十海以顯無盡。我唯一海，豈得同年。善男子，從此南行六十由旬楞伽道邊，有一聚落，名為海岸。彼有比丘，名曰妙住。汝詣彼問，菩薩云何令菩薩行速得清淨。

第五善男子從此南行下，指示後友。六十由旬者，修六度行，淨六根故。聚落名海岸者，楞伽道次南海北岸故。楞伽梵音，此云難往。居南海中，四面無門。非得通者，莫能往故。表於真心本離四句。得宗通者，方可會故。然有

無等，得意成門，入佛法故。失意成謗，增益等故。以門為門，則為言說，故曰無門。即門無門，是宗通矣。故曰難往。非不往也。今居此者，表修行住，是入智海真心絕相之正道故。比丘妙住者，身住虛空，無住相故。表此住中，觀一切法如虛空等，無有處所，離分別故。亦比丘者，入道未久，宜依僧故。前法此僧，義次第故。

時善財童子禮海雲足，右繞瞻仰，辭退而去。

第六時善財下，戀德禮辭。